

U skladu sa članom 11. i 12 Konvencije Vijeća Evrope o pristupu javnim dokumentima (Tromsø konvencija) („Službeni glasnik Bosne i Hercegovine-Međunarodni ugovori“, br. 8/11) i službenom obavijesti Grupe eksperata Vijeća Evrope za pristup javnim dokumentima i Ministarstva inostranih poslova Bosne i Hercegovine, Ministarstvo pravde Bosne i Hercegovine objavljuje

JAVNI POZIV

za prijavu kandidata iz Bosne i Hercegovine za članove Grupe eksperata Vijeća Evrope za pristup javnim dokumentima

I

U skladu sa članom 6. stav 1 Rezolucije o procedurama izbora članova Grupe eksperata Vijeća Evrope za pristup javnim dokumentima ((CM/Res(2021)2), pozivaju se sva zainteresovana lica da dostave prijave za nominaciju kandidata iz Bosne i Hercegovine za članstvo u Grupi eksperata Vijeća Evrope za pristup javnim dokumentima (u daljem tekstu: Grupa).

Grupa predstavlja jedno od dva nadzorna tijela osnovana Tromsø konvencijom o pristupu javnim dokumentima (CETS No. 205), a u skladu sa članom 11 navedene Konvencije nadležna je za praćenje njene primjene od strane država članica.

Bosna i Hercegovina ima pravo da nominira dva stručnjaka koji ispunjavaju uslove propisane Rezolucijom. Nominovana lica biće kandidati za popunu upražnjenog mjesta jednog člana Grupe za preostali dio tekućeg mandata (do 31. marta 2026. godine) i izbor između minimalno 10 i maksimalno 15 članova Grupe u novom četverogodišnjem mandatu koji počinje od 01. aprila 2026. godine.

Prvi termin izbora planiran je za 01. i 02. oktobar 2025. godine.

Više informacija o radu i sastavu Grupe dostupno je na sljedećem linku: <https://www.coe.int/en/web/access-to-official-documents/group-of-specialists>

II

Riječi i pojmovi korišteni u ovom Javnom pozivu, koji imaju rodno značenje odnose se jednako na muški i ženski spol u skladu sa Zakonom o ravnopravnosti spolova BiH („Službeni glasnik BiH“, br. 32/10).

III

Podnosilac prijave mora ispunjavati sljedeće uslove:

1. da je državljanin Bosne i Hercegovine,
2. da ima odgovarajući nivo stručnih kvalifikacija (akademsko obrazovanje), stručno znanje i iskustvo za obavljanje navedene dužnosti,
3. da ne obavlja rukovodeću dužnost u organima Bosne i Hercegovine ili organizacijama koje se bave definiranjem ili provođenjem politika u oblasti pristupa informacijama,
4. da aktivno vlada najmanje jednim od dva službena jezika Vijeća Evrope (engleski ili francuski). Pasivno znanje drugog službenog jezika Vijeća Evrope je poželjno,
5. da se ne vodi krivični postupak protiv tog lica,

6. da se na kandidata ne odnosi član IX, 1 Ustava BiH.

IV

Podnosilac prijave treba:

1. da je lice od integriteta odnosno visokih moralnih kvaliteta,
2. da je istaknut po svojoj stručnosti u području pristupa javnim dokumentima, slobode izražavanja i pristupa informacijama obuhvaćenim u oblastima Tromsø konvencije,
3. da u obavljanju dužnosti je nezavisan i nepristrasan,
4. da ima dovoljno raspoloživog vremena i mogućnosti za učešće na sastancima i u drugim aktivnostima Grupe.

V

Podnosilac prijave uz pisanu prijavu mora priložiti:

1. Biografiju na engleskom ili francuskom jeziku u skladu sa standardiziranim obrascem koji je sastavni dio Rezolucije CM/Res(2021)2, koji se može naći na web stranici Vijeća Evrope - <https://search.coe.int/cm/?i=0900001680a1a20f>,
2. Prevod biografije na jednom od službenih jezika Bosne i Hercegovine,
3. Uvjerenje o državljanstvu (ne starije od 6 mjeseci),
4. Potvrdu o visokoj stručnoj spremi (ovjerena kopija diplome o završenom fakultetu društvenog smjera),
5. Dokaz o radnom iskustvu na odgovarajućim poslovima u područjima navedenim u članu IV, tačka 2. (ovjerena kopija potvrde poslodavca ili drugi dokaz o zasnivanju i trajanju radnog odnosa iz kojih je vidljivo na kojima je poslovima kandidat radio ili objavljeni stručni ili naučni radovi ili učešće u radu međunarodnih organizacija ili na međunarodnim susretima, seminarima ili sastancima u području obuhvaćenim Tromsø konvencijom - lista radova i/ili potvrde učešća treba dostaviti kao prilog pisanoj prijavi) i
6. Dokaz o vladanju stranim jezikom navedenim u članu III, tačka 4. (ovjerenu kopiju potvrde o poznavanju engleskog ili francuskog jezika na najmanjem nivou C1, izdanu od škole stranih jezika odnosno drugih ustanova koje su verifikovane izdati takvu potvrdu, ili ovjerenu kopiju diplome završenog srednjoškolskog ili visokoškolskog obrazovanja sa vidljivim ocjenama iz predmeta engleskog ili francuskog jezika ili da je cjelokupno obrazovanje provedeno na engleskom ili francuskom jeziku, ili dokaz o radnom iskustvu u međunarodnoj organizaciji u kojoj se kao službeni jezik koristi engleski ili francuski jezik),
7. Potpisanu i ovjerenu izjavu da se protiv kandidata ne vodi krivični postupak. Naknadno se može tražiti uvjerenje nadležnog suda.

Podnosilac prijave u pisanoj formi (motivacijsko pismo) treba, između ostalog, da navede motive za podnošenje prijave, da obrazloži zbog čega smatra da je podobno lice za obavljanje dužnosti za koju se prijavljuje, te da navede iskustva stečena u oblastima iz nadležnosti Grupe.

VI

Dostavljene prijave razmotriće za ovu svrhu formirano komisijsko tijelo na osnovu gore navedenih uslova i dostavljenih prijava.

Komisijsko tijelo će, u skladu sa svojim ustavnim ovlaštenjima, izvršiti odabir najboljih kandidata za člana Grupe i dostaviti ih Tijelu za konsultacije sastavljenom od članica Tromsø konvencije.

Izbor i konačnu odluku o imenovanju članova Grupe donosi Tijelo za konsultacije.

Jedan kandidat od dostavljenih prijedloga svih zemalja članica se izabire za člana Grupe do kraja tekućeg mandata. Dva kandidata od dostavljenih prijedloga svih zemalja članica se izabire na period od 4 (četiri) godine, s mogućnošću obnavljanja još jednog mandata s tim da u proceduri reizbora Tijelo za konsultacije ima pravo smanjiti mandatni period.

VII

Članovi Grupe dužni su djelovati nezavisno i nepristrasno, te neće djelovati na osnovu instrukcija vlasti, organizacije ili pojedinca pri obavljanju svoje dužnosti.

Izabrani kandidat mora imati na raspolaganju dovoljno vremena i sposobnosti da učestvuje na sastancima i u drugim aktivnostima Grupe.

Članovi Grupe mogu biti i državni službenici ili zaposleni u javnom sektoru koji ne dolaze u sukob interesa ili su direktno uključeni u izrade politika iz nadležnosti Grupe.

VIII

Članstvo u Grupi ne podrazumijeva zasnivanje radnog odnosa i ne isključuje radni odnos u Bosni i Hercegovini ili inostranstvu, bez obzira na članstvo u Grupi, osim u slučajevima sukoba nadležnosti ili nespojivosti funkcija.

IX

Bosna i Hercegovina ne snosi troškove u vezi sa članstvom i funkcijom u Grupi.

X

Javni poziv se objavljuje i na web stranici Ministarstva pravde Bosne i Hercegovine, www.mpr.gov.ba.

Rok za podnošenje prijava je produžen do 01. 08. 2025. godine. Prijave na Javni poziv sa kompletnom dokumentacijom dostaviti direktno ili putem pošte, preporučeno, na adresu: Ministarstvo pravde Bosne i Hercegovine, Trg BiH 3, 71000 Sarajevo, sa naznakom „**Javni poziv - Grupa eksperata Vijeće Evrope za pristup javnim dokumentima**“. Nepotpune i neblagovremene prijave neće se uzeti u razmatranje.